

I Ladis sote Belun inze r'Euregio

I tre paes ladis de Anpezo, Col e Fodom de ra Consulta Ladina i à portà a Bolşan, al presidente Luis Durnwalder, ra tre deliberes de comun agnó che se diş che se vó ştà aduna con ra Provinzies de Trento e de Bolzan inze r'Euregio.

El *Manifesto delle Alpi*, el documento agnó che se poia r'Euregio intrà Italia e Austria, el và benon anche par i tre paeş ladis de Anpezo, de Col de Santa Luzia, de Fodom. Ignante de dute i 'l à dito i loudaduós de comun, che, inze i meş pasade, i à betù fora tre deliberes. Chi documento i é ştade portade, martes 15 de jenaro de 'l 2002, a Bolşan, al presidente de ra provinzia Luis Durnwalder. I é şude via de trope: el capocomun de Anpezo Paolo Franceschi, con el vize Bruno Dimai, chel de Fodom Ugo Ruaz con el vize Paolo Delmonego, chel da Col Paolo Frena, i presidentes de ra tre unios ladines Siro Bigontina, Raffaele Irsara e Paola Agostini, con Giulio Majoni e Giovanni Pellegrini.

Durnwalder, cemo do che 'l aea dito ignante, inze outra ocajios, 'l à vorù recordà che 'l é bon, polito, che outre i vore se bete aduna con ra rejos de r'Euregio. Cheşto vó di che chel manifesto 'l à inze algo de bon. Ra porta ra reşta daerta par outre, par dute chi che i é del medemo aviso. Durnwalder 'l à anche recordà ra ştoria che léa chişte tre paeş ladis con chi che i é sote Bolşan: se parla de ştoria, de saé, de parlada, ma anche de i problemes a vive su par ra crodes, de economia, de ştrades.

El capo comun de Anpezo Paolo Franceschi 'l à dito che el Manifesto 'l é un documento che el varda inaante, che el conta par el doman, par podé lourà aduna con ra Provinzia de Bolzan.

El presidente de r'Union de i Ladis d'Anpezo Siro Bigontina el diş duta ra sò sodisfazion: "*Son contente de aé betù a şì ra Consulta intrà i nostre tre paeş ladis. Dapò son şude adora a tirà da ra nostra anche ra tre aministrazios, che 'ş à fato ra tre deliberes par r'Euregio. Ades podon moe da cà par şì inaante e parlà aduna de economia, non solo de cultura, de saé. Par ra prima ota s'on ciatà con el noo asesor ladin da Bolşan Florian Mussner e on deziso de se ciatà inaante, outra otes, par vede che ra nostra tre unios es no reste taiades fora, ma che 'es pode èse pì pede a Bolşan. Ra leje 482 su ra minoranzas ra 'l diş polito: ra conzede che se laore aduna anche da ra doa bandes de un confin de rejon, de provinzia. E cheşto el 'l à dito anche el, canche 'l à parlà*".

Marco Dibona "Moro"